

Uss finalmain far quai ch'ins sto far

DA BERNARD CATHOMAS

■ **Il rapport da las Uniuns unidas davart ses program per l'ambient (Unep: United Nations Environment Programme) da quest'emna mussa cler e bain ch'il mund na vegn betg a cuntanscher las finamiras dal clima.** Quai stuess almar la politica e motivar dad insister che las mesiras decididas vegnian realisadas. Ma sco ins vesa en las medias vegn il messadi da l'Unep ignorà sco tants auters

cloms e segns ch'ins avess gia daditg stuì udir e vesair.

Mai anc ha ina partida svizra fatg in tal pass enavant sco ils verds en las davosas elecziuns naziunalas. Dal cussegl federal vul ins dentant sclauder els. Sco ils tactichers din èsi da spetgar fin ch'il success verd vegn confermà en las proximas elecziuns en quatter onns.

«Die Zeit drängt» è il titel dad in cudesch da C. F. von Weizsäcker dal 1987. Suenter trais decennis sto uss succeder

insatge curaschus ed obligant, cun u senza in cusseglier federal verd. Tut las partidas han scrit parolas ecologicas en lur programs. Tut sa oz che las terras civilisadas èn las grondas tartagnadras da l'ambient. Ellas èn dentant er organisadas e dotadas il meglier cun savida e raps per salvar l'ambient. Persuenter dovri leschas ed ordinaziuns cleras che vegnan controlladas. Recumandar e cussegljar na basta betg. Il nov parlament sto uss mussar ch'el sa dapli che spustar las decisiuns sin cur ch'igl è memia tard.

Dal temp da Weizsäcker ha Dörf Ogi da la pps mussà a la televisiun co spargnar energia cun coier ovs. Las chasarinas e blers auters rievàn. Ma el aveva raschun. Jau suppon che blers han suandà ses exempel. I dess anc blers auters secturs nua ch'ins savess cuntanscher ina massa, sche blers faschessan consequentamain er mo pitschnas midadas. Sche! Nua è il nov Ogi che mussa co far? Cura vegn l'obligaziun da far quai che sto vegnir fatg?

Quels dis ha il parlament europeic proclamà il stadi d'urgenza per il clima. Uss ston suandar las mesiras praticas. Urgentamain.

L'autur è pensiunà activ.

